

## Umiarsuarni angallatinilu atortut pillugit nalunaarut

Imarsiornerup isumannaatsuunissaanik inatsimmi § 3, imm. 1, nr. 1 aamma nr. 6, § 4, imm. 1 aamma § 32, imm. 8, takuuk inatsimmik nalunaarut nr. 654, 15. juni 2010-imeersoq, imarsiornerup isumannaatsuunissaanik inatsisip Kalaallit Nunaanni atuutilerneranik peqqussutikkut nr. 71, 29. januar 2013-meersukkut atuutilersoq, naapertorlugu Kalaallit Nunaanni Namminersorlutik Oqartussat isumasioreerlugit piginnaatitsissullu malillugu makku aalajangersarneqarput:

§ 1. Maleruagassami pineqarpoq Siunnersuisoqatigiit umiarsuarni angallatinilu atortut pillugit malittareqqusaata 96/98/EF 20. december 1996-imeersup, Kommissionip malittareqqusaatigut 98/95/EF 11. november 1998-imeersukkut, Kommissionip malittareqqusaatigut 2001/53/EF 10. juli 2001-imeersukut, Kommissionip malittareqqusaatigut 2002/75/EF 2. september 2002-meersukkut, Europa-Parlamentip, Siunnersuisoqatigiit malittareqqusaatigut 2002/84/EF 5. november 2002-meersukkut, Kommissionip malittareqqusaatigut 2008/67/EF 30. juni 2008-meersukkut, Kommissionip malittareqqusaatigut 2009/26/EF 6. april 2009-meersukkut, Kommissionip malittareqqusaatigut 2010/68/EU 22. oktober 2010-meersukkut aamma Kommissionip malittareqqusaatigut 2011/75/EU 2. september 2011-meersukkut aamma Kommissionip malittareqqusaatigut 2012/32/EU 25. oktober 2012-ikkut allangortinneqartup naammassineqarnera.

*Imm.* 2. Umiarsuarni angallatinilu atortut pillugit erseqqinnerusumik malittarisassat maleruagassami ilanngussatut naqiterneqarput.

§ 2. § 1-imik unioqqutitsinerit akiliisitaanermik imaluunniit ukioq ataaseq parnaarussaaneermik pineqaatissiissutigineqassapput.

*Imm.* 2. Pillaaneq ukiut marluk angullugit parnaarussaaneermut sivitsorneqarsinnaavoq,

- 1) unioqqutitsinermi inuunermik peqqissutsimilluunniit ajoqusiisoqarpat imaluunniit tamatumunnga navianartorsiortitsisoqarpat,
- 2) assinganik assingusumilluunniit unioqqutitsinermi inerteqqummik naalakkiummilluunniit siusinnerusukkut pineqaatissiisoqareersimappat, imaluunniit
- 3) unioqqutitsinikkut unioqqutitsisoq allalluunnit aningaasatigut iluaqutissarsippata iluaqutissarsiniarneqarsimappalluunniit.

*Imm.* 3. Unioqqutitsinermi iluanaarummik pissarsiarineqartumik arsaarinnittoqanngippat, akiliisitsinerup annertussusilernerani, tamatumani aamma ilassummik akiliisitsinermi, aningaasatigut iluaqutissarsiat imaluunniit pissarsiat annertussusiat immikkut eqqarsaatigineqassaaq.

*Imm.* 4. Ingerlatseqatigiiffiit il.il. (allat sinnerlugit inatsisitigut ingerlatsisut) pineqaatissiisarneq pillugu inatsimmi kapitali 5-imi malittarisassat malillugit pineqaatissinneqarsinnaapput.

§ 3. Pisimasoq imarsiornerup isumannaatsuunissaa pillugu inatsisip Kalaallit Nunaanni atuutilerana pillugu peqqussummi pineqartunut ilaappat, Kalaallit Nunaanni pinerluttulerinermi inatsit naapertorlugu pineqaatissiisoqarsinnaavoq.

*Imm. 2.* Pissutsit § 2, imm. 2-mi taaneqartut sukannernerusumik pineqaatissiinissamut tunngavissatut isigineqassapput.

*Imm.3.* Iluanaarummik, pinerluttulerinermi inatsimmi kap. 37 naapertorlugu, unioqutitsinermi pissarsiarineqartumik arsaarinnittoqanngippat, akiliisitsinerup annertussusilernerani, tamatumani aamma ilassummik akiliisitsinermi, aningaasatigut iluaqutissarsiat imaluunniit pissarsiat annertussusiat immikkut eqqarsaatigineqassaaq.

*Imm. 4.* Ingerlatseqatigiiffik il.il. (allat sinnerlugit inatsisitigut ingerlatsisut) unioqutitsippat, akisussaassuseqarfik akiliisitaanermik pineqaatissinneqarsinnaavoq. Naalagaaffik, Kalaallit Nunaanni Namminersorlutik Oqartussat, kommunit, kommunip ataatsimoorussiffia, kommunalbestyrelsit, nunaqarfinni aqutsisut il.il., imaluunniit nunaqarfimmi aqutsisut pisortatut oqartussaasut pillugit inatsisartut inatsisaanni § 64-imi pineqartunut ilaasoq, unioqutitsippat, pisortat oqartussaaffiat pineqartoq akiliisinneqarsinnaavoq.

*Imm. 5.* Pineqartoq Kalaallit Nunaanni najugaqanngippat, imaluunniit inuiaqatigiinnut kalaallinut attaveqarnera aalajangersimasuunngippat, pineqaatissiinissaq tunngavissaqarani, suliaq Danmarkimi suliaannagortinneqarsinnaavoq imaluunniit Danmarkimi malersugassatut innerssuunneqarsinnaalluni.

§ 4. Nalunaarut manna 30. november 2013-mi atuutilerpoq.

*Imm. 2.* Umiarsuarni angallatinilu atortut pillugit nalunaarut nr. 983, 9. oktober 2012-meersoq peqatigitillugu atorunnaarsinneqarpoq.

*Imm. 3.* Atortut ilanngussaq A.1-imi oqaatigineqartut imaluunniit ilanngussaq A.2-miit ilanngussaq A.1-imut nuunneqartut, aamma 30. november 2013 nallertinnagu sanaat, typit akuersissuteqartarneranni periuseq naapertorlugu, naalagaaffimmi ilaasortaasumi ulloq taaneqartoq nallertinnagu atuutereersut, ulloq taaneqartoq tikitsinnagu EU-mi umiarsuarmut angallammulluunniit 30. november 2015 tikillugu tuniarneqarsinnaapput ikkussuunneqarsinnaallutillu.

*Søfartsstyrelsen, ulloq 11. november 2013*

PER SØNDERSTRUP

/Søren Enemark